

DOMENIE XXVI «VIE PAL AN»

Jutoris pe Liturgjie

Domenie, Prin di Otubar dal 2017

Tal vanzeli di vuê o cjatî di cuatri categoriis di personis: 1) i sorestants dai predis - 2) i anzians dal popul - 3) i publicans - 4) i sdrondinis. Nus vegnin ancje presentâts i doi protagoniscj: Zuan su la strade de justissie e Gjesù che al nunziave il vanzeli dal ream e al vuarive ogni sorte di malatie (cfr. Mt 4, 23-25).

Gjesù midiant la parabule dai doi fis al fasarà capî: i sorestants dai predis e i anzians di Gjerusalem a disin di fâ la volontât di Diu ma te pratiche no le fasin; i publicans e i sdrondinis a disin un "no" che te pratiche al è un "sì". Di fat, chescj i àn crodudi al mes di Zuan e di Gjesù cambiant la lôr vite, intant che i caporions di Gjerusalem, tal non de leç di Mosè e convints di fâ la volontât di Diu, no àn sintude reson e si son sierâts a riç.

La polemiche fra une religjon blockade e une spiritualitât gnove, par Gjesù si è rivelade fatâl; no je stade remission; i è costadi la condane e la muart in crôs.

Cumò la domande e je: in ce categorie mi cjatijo? Tai: sorestants - anzians - publicans - sdrondinis? Parcè che: o pues vê la mentalitât religjose dai sorestants dai predis di Gjerusalem che tes lôr tradizions a copin la peraule di Gjesù. Opûr, la peraule di Gjesù mi tirje fûr di une religjon sclerotizade par insegnâmi a vivi une vite gnove tal ream di Diu?

Antifone di jentrade

Dn 3,31.29.30.43.42

Signôr, dut ce che tu nus âs mandât tu lu âs fat seont une sentence vere;
o vin pecjât cuintri di te, no vin ubidît ai tiei comandaments;
ma cumò dai glorie al to non e tratinus seont la ricjece dal to boncûr.

Colete

Diu, che tu palesis la tô plui grande fuarce
cuant che tu perdonis e tu âs dûl,
fâs risinâ cence polse sore di nô la tô grazie,
par ch'o corin viers di ce che tu âs imprometût
e o spartî cun te l'heritât dal cîl.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Ez 18,25-28

Se il trist si mende de tristerie ch'al à vude, si salvarà.

Tancj o pôcs, si slontanin de glesie parcè che a disin come ai tîmps dal profete: Nol è just il mût di fâ dal gno Signôr! Ma ancje vuê, nus rispuint il Signôr: Esal il gno mût di fâ che nol va o no esal forsit il vuestri fûr di plomp? Al pò dâsi: il Diu che nus àn insegnât al à une imagjine che no ten plui, o forsit nus fâs plui comut la societât atee di vuê, o forsit o concludin che la religjon e sta murint insiemi cui paîs cence int o cence relazions, o forsit ancjemò e je confusion dentri di nô...

Ma e reste la domande: Cui isal fûr di plomp? Il Signôr o noaltris?

Dal libri dal profete Ezechiele

Cussì al dîs il Signôr: «Vualtris o disês: Nol è just il mût di fâ dal gno Signôr!
Scoltâmi ben, cjase di Israel. Esal il gno mût di fâ che nol va o no esal forsit il vuestri fûr di plomp? Se il just si slontane de justizie, nol è plui just e si bute malamentri e par chel al mûr, al à di murî pal mâl ch'al à fat! Se invezit il trist si mende de tristerie ch'al à vude e al met in vore lis leçs e la justizie, si salvarà. Se, spaventât, si mendarà di dutis lis ribelions ch'al à fat, sigûr ch'al vivarà, nol à di murî».

Peraule di Diu.

SALM RESPONSORIÂL

dal Salm 24

O cjalin a Gjesù. I sorestants dai predis e i anzians dal popul no rivavin a fâi a Gjesù lis invocazions di chest salm, intant che i publicans e lis sdrondinis a preavin: Visiti, Signôr, dal to boncûr. Mostrimi, Signôr, lis tôs stradis.

Stin dongje dal Signôr in umiltât, come i pecjadôrs, parcè che o sin pecjadôrs. E alore al sarà scrit ancje a nestri favôr: e ur insegnarà la sô strade.

R. Visiti, Signôr, dal to boncûr.

Secjantât: Il cjant dai salms responsoriâi, p. 76.

Mostrimi, Signôr, lis tôs stradis,
insegnimi i tiei trois.

Fasimi lâ indenant te tô fedeltât,
parcè che tu tu sês il Diu che mi salve
e dute la mari dal di jo ti spieti. **R.**

Visiti, Signôr, dal to boncûr
de tô misericordie che di simpri e dure.
I pecjâts ch'o ai fats di zovin
e lis mês colpîs dismenteilis,
visiti di me seont il to boncûr,
Signôr, te tô misericordie. **R.**

Bon e just al è il Signôr;
par chel al indreçarà i pecjadôrs pe sô strade.
Al fasarà cjaminâ i pùars te sô justizie
e ur insegnarà la sô strade. **R.**

SECONDE LETURE

Fil 2,1-11

Cirî di sintî dentri di vualtris ce ch'al à di sintî chel ch'al è in Crist Gjesù.

La leture che la liturgjie nus presente e je fra lis pagjinis plui bielîs di S. Pauli e nus palese in maniere uniche il misteri de devinitât-umanitât di Gjesù; di lui ubidient fint a la muart ma ancje che Diu lu à quartât in alt te glorie. L'apuestul nus racomande: te comunitât - cun o cence predi - no stait a fâ nuie par ambizion ma cirî di vê i sentimenti di Gjesù, lui che...

Il miôr catechist des nestris comunitâts al è chel che si met intorsi un grumâl, come che al à fat Gjesù te ultime cene e al comence a lavâ o il pavimento de glesie o i pîts di un malât.

De letare di san Pauli apuestul ai Filipês

Fradis, s'e je une consolazion in Crist, s'al è un confuart ch'al vegni dal amôr, s'e je une cualchi colegance di spirt, s'al è un cûr plen di compassion, jemplaitmi di gjonde cul lâ d'acuardi, cul praticâ il stes amôr, cul stes volê e cul stes sintî. No stait a fâ nuie par ambizion ni par supierbie, ma cun dute umiltât stimait chei altris plui bogns di vualtris; no smicjant ognidun a fâ dome i siei interès ma ancje chei di chei altris.

Cirî di sintî dentri di vualtris ce ch'al à di sintî chel ch'al è in Crist Gjesù,

lui che, jessint Diu par nature,
nol à ritignût un ben di no molâlu
il so jessi compagn di Diu,
ma si è ridusût a nuie
cjapant sù la nature di sotan
e diventant compagn dai oms;

comparît in forme di om,
si è sbassât inmò di plui
fasintsi ubidient fint a la muart
e a la muart di crôs.
Par chel Diu lu à puartât in alt
e i à dât chel non
ch'al è plui alt di ogni altri non,
par che tal non di Gjesù
si plei ogni zenoli
des creaturis dai cî, de tiere e di sot tiere
e ogni lenghe e professi
che Gjesù Crist al è il Signôr,
a glorie di Diu Pari.
Peraule di Diu.

CJANT AL VANZELI

Zn 10,27

R. Aleluia, aleluia.

Lis mês pioris a scoltin la mê vôs, al dîs il Signôr,
jo lis cognòs e lôr mi vegin daûr.

R. Aleluia.

VANZELI

Mt 21,28-32

Pintût, al lè. I publicans e lis sdrondinis us passin denant tal ream dai cî.

I doi fradis cul lôr "sì" e il lôr "no" a lozin e si son stabilîts tes vissaris di ognun di noaltris.

Di fat al scrîf S. Pauli: No fâs il ben che o volarès: ma o fâs ce che no volarès, e al è mâl.

Al zonte: Joi, puar mai me! Cui mi liberaraial di chest cuarp... Ch'al sedi ringrassiât Diu midiant di Gjesù Crist nestri Signôr! (Cfr. Rm 7, 18-25).

Di fat ancje vuê o vin di ringrassiâ Gjesù che nus vise di ce bande metisi, e ce che o vin di fâ.

In cheste parabule e je evidente la situazion dal nestri popul in Friûl. E ven rapresentade ancje la situazion de glesie li che lis cuatri categoriis de int a son ben rapresentadis dai doi fradis.

Dal vanzeli seont Matieu

In chê volte, Gjesù al disè ai socestants dai predis e ai anziani dal popul: «Ce us parial? Un om al veve doi fis. Lant a fevelâ cul prin, i disè: Fi, vuê va a vore tal vignâl. Chel i rispuindè: O voi, paron; ma nol le gran. Al le a fevelâ cul secont e i disè la stesse robe. Chel i rispuindè: No voi. Ma dopo, pintût, al lè. Cuâl dai doi aial fate la volontât dal pari?». I rispuindin: «L'ultin». E Gjesù a lôr: «Us al dîs in veretât: i publicans e lis sdrondinis us passin denant tal ream dai cî. Di fat al è vignût Zuan su la strade de justizie e vualtris no i vês crodût; invezit i publicans e lis sdrondinis i an crodût. Vualtris, seben che o vês viodût, no si sês pleâts nancje dopo a crodi in lui». Peraule dal Signôr.

Su lis ufiertis

Diu di misericordie,
danus la gracie che cheste nestre ufierte ti plasi
e nus spalanchi la risultive di ogni benedizion.
Par Crist nestri Signôr.

Antifone a la comunion

cf. Sal 118,49-50

Impensiti, Signôr, de perauale che tu i âs dade al to famei,
tu mi âs dât parie ancje la sperance;

chest mi à dât confuart te mê miserie.

O ben: 1 Zn 3,16

Di chest o vin cognossût l'amôr di Diu:
lui al à dade la sô vite par nô;
par chel ancje nô o vin di dâ la nestre vite pai fradis.

Daspò de comunion

Il misteri dal cîl che nus ristori, Signôr,
te anime e tal cuarp, par spartî inte glorie l'ereditàt
di chel ch'o partecipin a la sô passion e o proclamìn la sô muart.
Lui ch'al vîf e al regne tai secui dai secui.

* * *

Riflession di pre Antoni Beline: Fedeltât a bocje e cui fats

La peraule che vuê Crist nus dîs, s'o vin dome un sclip di cussiense, o varessin di lâ sot tiere di vergogne parcè che e je propit par nô. Par nô che, biel jentrant te vite, o vin imprometude fedeltât e dut ce ch'al coventave. E podopo, par ordin che si cresceve, no vin mai sbalgjât di imprometi rinunciis sore rinunciis: a satane, a dut il mâl, a dutis lis tentazions...

Vanseli par un popul, an A, p. 196

* * *

Sante messe e Eucaristie, rîts, preieris, cjants: Hosanna pp. 34 - 119.

Joibe 5: s. Luîs Scrosoppi (Udin, 4 di Avost dal 1804 – 3 di Avrîl dal 1884)

Grant apuestul de caritàt che par sostentâ lis frutis de Cjase des derelitis no si vergognà di lâ a pitocâ. Al de dongje lis Muiniis de Providence che si sparniçarin in Italie, in Americhe Latine, in Afriche e in Indie. Al è stât proclamât sant tal an 2001.

* * *

O volarès che la persone, prime di ogni altre cognossince, e cognossès se stesse.

S. Bernard

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitàt todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*

* *Par domandâ chescj libris scrivêt a info@glesiefurlane.org*